

ШУУДАНГИЙН ХАРИЛЦАН ХОЛБОЛТЫН ЖУРАМ

НЭГ. НИЙТЛЭГ ҮНДЭСЛЭЛ

1.1 Монгол улсад шуудангийн үйлчилгээ эрхлэх тусгай зөвшөөрөл эзэмшигчдийн шуудангийн сүлжээ, үйлчилгээний чанар, хүртээмж, мэдээллийн уялдааг нэмэгдүүлэхэд энэхүү журмын зорилго оршино.

1.2. Шуудангийн үндсэн сүлжээ эзэмшигч болон шуудангийн сүлжээ байгуулах, түүний ашиглалт үйлчилгээ эрхлэгч, шуудангийн үйлчилгээ эрхлэх тусгай зөвшөөрөл бүхий компаниуд сүлжээ хооронд харилцан холболт хийх, сүлжээнд холбогдохдоо Монгол Улсын холбогдох хуулиуд болон энэхүү журмыг үндэслэн байгуулна.

1.3. Энэхүү журмаар Шуудангийн тусгай зөвшөөрөл эзэмшигч компаниудын нийтийн шуудангийн үйлчилгээ болон улс, хот хоорондын дамжих шуудангийн илгээмжийг солилцох терминал, тэдгээрийн тээвэрлэлт, бүртгэл хяналтын систем зэрэг технологийн үйл ажиллагааг зохицуулна.

ХОЁР. ШУУДАНГИЙН ХАРИЛЦАН ХОЛБОЛТЫН ГЭРЭЭНИЙ ЕРӨНХИЙ НӨХЦӨЛ

2.1 Шуудангийн сүлжээний үйлчилгээ эрхлэгч нь сүлжээнд харилцан холболт хийх гэрээний ерөнхий нөхцөлийг хангасан шуудангийн үйлчилгээ эрхлэгчийг өөрийн сүлжээнд холбогдох боломжийг бүрдүүлнэ.

2.2. Талууд нь харилцан холболт хийхдээ дараах нөхцөлийг баримтална:

2.2.1. Харилцан холболт хийх үйлчилгээний тарифыг өртөгт үндэслэн талуудын эрх ашигт нийцүүлсэн байх;

2.2.2 Харилцан холболтын явцад шинэ техник, технологи, шинэ бүтээгдэхүүн үйлчилгээг нэвтрүүлэхтэй холбоотой нэмэлт хөрөнгө оруулалт, зардлыг талууд харилцан тохиролцох;

2.2.3 Шуудангийн илгээмжийг хүлээх авах, ялган боловсруулах, дамжуулах, хүргэлтэд мөрдөгдөх, стандарт технологийн горим, хүргэлтийн графикт маршрутаар тооцон гаргасан илгээмжийг хүргэх хугацаа, мэдээлэл солилцох;

2.2.4. Талууд шуудан солилцох үйлчилгээний салбар цэгийг харилцан зөвшилцөж, тогтоох;

2.2.5. Харилцан холболтын үйлчилгээнд өөрийн үйлчилгээний чанарын үзүүлэлтээс бууруулахгүй байх;

2.2.6. Үйлчилгээнд нөлөөлөх, эсвэл үйлчилгээг тасалдуулж болзошгүй саатал болон амралтын үеийн хуваарийг харилцан холбогдсон талуудад тухай бүрд мэдэгдэх;

2.3. Талууд харилцан холболтын тарифыг зөвшилцөж өөрсдөө тогтооно.

2.4. Харилцан холболтын төлбөр тооцоо нийлэх хугацааг талууд харилцан тохиролцоно.

ГУРАВ. ТАЛУУДЫН ХҮЛЭЭХ ҮҮРЭГ, ХАРИУЦЛАГА.

3.1. Шуудангийн үндсэн сүлжээ эзэмшигч нь улс хот хоорондын шуудангийн терминал, хот, аймаг сумдын шуудангийн тасаг, салбарууд, улс хот хоорондын шуудангийн нэгдсэн тооцоо, бүртгэл, хяналтын нэгдсэн системийн зохион байгуулалт, ашиглалт үйлчилгээг хариуцна.

3.2. Үндсэн сүлжээнд шуудангийн хувийн хэвшлийн компаниудыг холбогдох технологийн болон бусад нөхцөлийг бүрдүүлж гэрээг байгуулна.

3.3 Шуудангийн илгээмжийн хүлээн авах, гардуулалтыг шуудангийн үйлчилгээ эрхлэгч өөрийн хариуцлагын хүрээнд шуудангийн стандарт шаардлагыг хангуулан бусдаар гүйцэтгүүлж болно.

3.4. Шаардлагатай тохиолдолд үндсэн сүлжээний техник, технологийг сайжруулах, шинэчлэх талаар харилцан холбогдсон талуудтай санал солилцож, хамтран ажиллах боломжийг судалж шийдвэрлэнэ.

3.5 Шуудангийн үйлчилгээ эрхлэгч нь бүртгэл, хяналтын нэгдсэн системийн API холболтыг бусад сүлжээнд нээлттэй холбогдох боломжийг бүрдүүлнэ.

3.7. Шуудангийн үйлчилгээ эрхлэгч нь бүртгэл-хяналтын нэгдсэн системийн API холболтыг бусад сүлжээтэй нээлттэй, стандартад нийцсэн байдлаар холбогдох боломжийг бүрдүүлнэ.

3.8 Шуудангийн илгээмжийг хүлээн авах, ялган боловсруулах, хүргэх үйл ажиллагаанд Шуудангийн аюулгүй байдал MNS 5539:2019, Шуудангийн үйлчилгээнд тавих шаардлага MNS 6776:2019 стандартыг мөрдөнө.

ДӨРӨВ. СҮЛЖЭЭ ХООРОНД ХАРИЛЦАН ХОЛБОЛТ ХИЙХ БОЛОН СҮЛЖЭЭНД ХОЛБОГДОХ ХҮСЭЛТ ГАРГАХ, ХҮЛЭЭН АВАХ, ХАРИУГ ӨГӨХ

4.1. Шуудангийн үйлчилгээ эрхлэгч нь сүлжээ хооронд харилцан холболт хийх болон сүлжээнд холбогдох хүсэлтийг шуудангийн үйлчилгээ эрхлэгчид бичгээр гаргана.

4.2. Шуудангийн үйлчилгээ эрхлэгч нь уг хүсэлтийг хүлээн авч өөрийн сүлжээний техникийн боломж, гэрээний нөхцөлийг хангаж буй эсэхийг нягталж, өөрийн сүлжээнд холбогдох болон сүлжээ хооронд харилцан холболт хийх боломжтой эсэх

талаар судалж, ажлын 10 хоногийн дотор хариуг хүсэлт гаргасан талд бичгээр мэдэгдэнэ.

4.3. Шуудангийн үйлчилгээ эрхлэгч нь техникийн нөхцөл гаргах боломжгүй бол хүсэлт гаргагч талд тухайн нөхцөлийг бүрдүүлэх боломжтой болох хугацааг тодорхой дурдсан холбогдох тайлбарыг хүргүүлэх ба хувийг Зохицуулах хороонд ирүүлнэ.

ТАВ. ТЕХНИКИЙН НӨХЦӨЛ

5.1. Шуудангийн үйлчилгээ эрхлэгч нь техникийн боломжийг харгалзан өөрийн сүлжээнд бусад сүлжээг саадгүй холбох нөхцөлийг хангана.

5.2. Шуудангийн бүртгэл, хяналтын дотоод систем нь бусад үйлчилгээ эрхлэгчийн системтэй API интерфейс ашиглан интеграцлагдсан байхаар зохион байгуулна.

5.3. Мэдээлэл солилцох формат, протокол, хамгаалалтын шаардлага нь стандартад нийцсэн байна.

5.4. Шуудангийн үйлчилгээ эрхлэгч нь өөрийн сүлжээний найдвартай байдлыг хангаж, гаднын халдлагаас хамгаалах, урьдчилан сэргийлэх арга хэмжээг авч ажиллах ба уг шаардлагыг хангаагүйн улмаас сүлжээ хооронд харилцан холболт хийсэн эсхүл сүлжээнд нь холбогдсон харилцаа холбооны үйлчлэгчид үүссэн хохирлыг хариуцна.

5.5. Илгээмжийн бүртгэл, хаягжуулалт, хүргэлтийн мэдээлэл автоматаар солилцох боломжийг бүрдүүлсэн байна.

5.6. Шуудангийн үйлчилгээ эрхлэгчид харилцан холболт хийх, сүлжээнд холбогдоход интеграцлагдсан системээр илгээмжийн бүртгэл, солилцоо, хүргэлтийн төлөвийн мэдээллийг бодит хугацаанд API интерфейсээр солилцоно.

5.7. Талууд нь өөрийн үйлчилгээг өргөтгөх, шинэчлэх, татан буулгах зэрэг өөрчлөлтөөс үүдэн харилцан холболтод нөлөөлөхүйц нөхцөл байдал үүсэхээр бол мэдээллийг 3 сарын өмнө холбогдох талуудад болон Харилцаа холбооны зохицуулах хороонд мэдэгдэнэ.

ЗУРГАА. СҮЛЖЭЭНД ХОЛБОГДОХ БОЛОН СҮЛЖЭЭ ХООРОНД ХАРИЛЦАН ХОЛБОЛТ ХИЙХ ГЭРЭЭ

6.1. Шуудангийн үйлчилгээ эрхлэгч нь сүлжээнд холбогдох болон сүлжээ хооронд харилцан холболт хийх гэрээг энэхүү журмын дагуу зөвхөн бичгээр, Монгол хэлээр байгуулна.

6.2. Сүлжээнд холбогдох болон сүлжээ хооронд харилцан холболт хийх хүсэлтийг хүлээн авснаас хойш ажлын 10 хоногийн дотор гэрээ байгуулна.

6.3. Сүлжээнд холбогдох болон сүлжээ хооронд харилцан холболт хийх гэрээнд талууд гарын үсэг зурсан өдрөөс хойш ажлын 10 хоногийн дотор уг гэрээ болон түүний хавсралт, холбогдох баримт бичгийн хамт Зохицуулах хороонд бүртгүүлэх ба уг гэрээнд орсон нэмэлт өөрчлөлт бүрийг тухай бүр бүртгүүлнэ.

6.4. Зохицуулах хороо нь энэхүү журмын дагуу байгуулаагүй сүлжээнд холбогдох болон сүлжээ хооронд харилцан холболт хийх гэрээг бүртгэхээс татгалзах эрхтэй бөгөөд шуудангийн үйлчилгээ эрхлэгч нь уг гэрээг энэхүү журамд нийцүүлэн байгуулж, дахин бүртгүүлэхээр хандана.

6.5. Шуудангийн үйлчилгээ эрхлэгч нь гэрээг байгуулахаас өмнө Зохицуулах хороонд хандаж, гэрээний төслийг хянуулах болон холбогдох заавар зөвлөмжийг авч болно.

6.6. Зохицуулах хороо бүртгүүлсэн гэрээний нэгдсэн санг бүрдүүлж ажиллах бөгөөд мэдээллийг олон нийтэд нээлттэй мэдээлнэ.

ДОЛОО. МАРГААН ШИЙДВЭРЛЭХ

7.1. Энэхүү журам, гэрээг зөрчсөн болон харилцан холболттой холбоотой бусад маргаантай асуудлыг Харилцаа холбооны тухай хуулийн 9.1.12, 31.2-т заасны дагуу Харилцаа холбооны зохицуулах хороо бүрэн эрхийнхээ хүрээнд шийдвэрлэнэ.

7.2. Энэхүү журмын 6.2, 6.4 дэх заалтын дагуу бүртгүүлээгүй гэрээтэй холбоотой үүссэн маргааныг Зохицуулах хороо шийдвэрлэхгүй.

7.3. Маргаантай асуудлыг шийдвэрлэхдээ Зохицуулах хороо дараах аргуудыг хэрэглэж болно. Үүнд:

7.3.1. Маргаантай асуудлыг судлахын тулд шаардлагатай мэдээллийг талуудаас авах;

7.3.2. Авсан мэдээллийг судлах, дүн шинжилгээ хийх, баримт гаргаж тавих;

7.3.3. Талуудын тайлбар, саналыг сонсох, шаардлагатай гэж үзвэл олон нийтийн санал авах;

7.3.4. Шаардлагатай бол хэмжилт, шалгалтыг хийх, баримт гаргаж тавих;

7.3.5. Ижил төстэй байгууллагууд болон олон улсын туршлагыг судлан харьцуулалт хийх;

7.3.6. Маргаантай асуудлын талаар тус хорооны холбогдох мэргэжилтний судалгаа, дүгнэлтэд үндэслэх;

7.3.7. Тухайн чиглэлээр мэргэшсэн мэргэжилтнүүд, хуульчид, эдийн засагчид, эрдэмтэд зэргээс бүрдсэн тусгай ажлын хэсэг гарган ажиллуулах;

7.3.8. Маргалдагч талуудын төлөөллөөс бүрдсэн ажлын хэсгийг санаачлан байгуулж, тухайн асуудлаар санал солилцуулан нэгдсэн шийдвэрт хүргэхэд чиглэсэн ажлыг зохион байгуулах

7.4. Зохицуулах хороо нь маргаантай асуудлаар мэргэжлийн дүгнэлт гаргах, санал зөвлөмж өгөх, гэрээг дахин авч үзэх тухай хугацаатай үүрэг даалгавар өгөх, маргааныг шийдвэрлэж болох хувилбаруудыг санал болгох зэргээр тодорхой шийдвэрийг гаргана.

7.5. Зохицуулах хороо нь маргаантай асуудлаар гаргах шийдвэрийн талаар талуудад урьдчилан талуудад танилцуулж, саналыг нь авах, нээлттэй хуралдаанаар хэлэлцэж шийдвэрлэх замаар ил тод зарчмыг баримтална.

7.6. Зохицуулах хороо нь маргаантай асуудлаар тухайн нөхцөл байдалд тохируулан үл ялгаварлах, шударга, өрсөлдөөнийг дэмжсэн шийдвэр гаргана.

7.7. Маргалдагч талууд Зохицуулах хорооноос гаргасан шийдвэрийг хүлээж авахыг эрмэлзэх бөгөөд уг шийдвэрийг хүлээн зөвшөөрөхгүй бол шүүхэд хандаж болно.

НАЙМ. ХАРИУЦЛАГА ТООЦОХ

8.1. Энэхүү журмыг зөрчсөн тохиолдолд Зохицуулах хороо нь холбогдох хууль, тогтоомжийн дагуу шийдвэрлэнэ.

--- оОо ---